

Fakta nombor**1,000 RESPONDEN**

babit 500 lelaki dan 500 wanita serta kajian dijalankan aplikasi janji temu popular di Asia, JustDating

20 PERATUS

responden mengakui pernah curang atau tidak setia dengan pasangan masing-masing

50 PERATUS

lelaki di Malaysia nyata kesediaan bertolak ansur kecurangan teman wanita

70 PERATUS

wanita tamatkan hubungan serta-merta jika terbukti pasangan gilakan wanita lain

[FOTO HIASAN]



Nilai dan budaya Timur yang masih kuat diamalkan
antara faktor rakyat Malaysia tetap setia kepada pasangan masing-masing.

Rakyat Malaysia paling setia ketika bercinta: Kajian



JustDating turut dapati definisi curang antara lelaki, wanita berbeza

Oleh Norhafzan Jaafar
hafzan@bh.com.my

Kuala Lumpur

Rakyat Malaysia dikatakan paling setia dari segi emosi ketika bercinta tetapi pemahaman mereka mengenai kecurangan berbeza antara golongan lelaki dan wanita.

Kajian oleh aplikasi janji temu popular di Asia, JustDating juga mendapati wanita meletakkan keutamaan kepada emosi dengan menganggap pasangan mereka curang apabila mula tergilakwanita lain.

"Biarpun tidak pernah berlaku sebarang sentuhan tubuh dengan 'orang ketiga,' wanita tetap menganggap teman lelaki mereka bersikap curang dalam percintaan.

"Sebenarnya, bagi lelaki Malay-

sia, kecurangan hanya berlaku apabila berlaku sebarang sentuhan tubuh dengan wanita selain teman wanitanya," kata siaran akhbar yang mendedahkan kajian itu, semalam.

Perkara itu dipersejui Ketua Seksyen Psikoterapi dan Intervensi Bahagian Kaunseling Universiti Putra Malaysia (UPM), Siti Fatimah Abdul Ghani, yang menyifatkan faktor kepercayaan dan pegangan budaya menguatkan kesetiaan dalam kalangan pasangan lelaki dan wanita di negara ini.

Masih amal budaya Timur

Katanya, nilai dan budaya Timur yang masih kuat diamalkan di negara ini menambahkan lagi kepercayaan mereka untuk terus setia dan kekal dengan pasangan masing-masing.

"Malah, dari sudut spiritual, jika dilihat biarpun ada pasangan bertindak curang, mereka terus mahu memberikan peluang kedua-dua dengan harapan orang disayangi itu mampu berubah ke arah kebaikan."

"Biasanya perempuan lebih cenderung memberikan peluang kepada kerana kebiasaan, selain memiliki sifat setia, mereka juga lebih reda dan bersedia menerima semula kehadiran pasangan."

"Lelaki pula membuat keputusan lebih cepat apabila berlaku sesuatu dengan harapan menyelesaikan perkara dengan segera," katanya ketika dihubungi BH, di sini, semalam.

Beliau berkata demikian ketika mengulas kajian JustDating membabitkan tinjauan terhadap pengguna di Malaysia mengenai pengalaman dalam percintaan.

Keputusan kajian menunjukkan hanya 20 peratus responden mengakui pernah curang atau tidak setia dengan pasangan masing-masing dengan peratusan lelaki 10 mata lebih tinggi berbanding wanita.

Kajian sama terhadap penduduk Taiwan dan Singapura mendapat 20 peratus responden mengakui tidak pernah setia kepada pasangan berbanding penduduk di Indonesia yang menunjukkan peringkat sebanyak 40 peratus.

Secara kesimpulan, kajian itu mendapati penduduk di Malaysia paling setia dari segi emosi apabila membabitkan soal percintaan.

Siti Fatimah berkata, secara keseluruhan, kesetiaan ditunjukkan pasangan sama ada lelaki atau perempuan bergantung kepada latar belakang sosial termasuk hubungan dengan keluarga, rakan dan pengaruh persekitaran mereka.

"Jika persekitaran mereka positif, sifat dipegang mereka juga turut positif, malah menjadi faktor kepada sejauh mana kesetiaan yang mampu mereka buktikan," katanya.

Definisi berbeza curang

Kajian JustDating juga mendapati selain memiliki definisi berbeza membabitkan kecurangan atau tidak setia, golongan lelaki dan wanita berbeza pendapat dalam menangani masalah itu dengan pasangan masing-masing.

"Apabila dikhianati, 50 peratus lelaki di Malaysia menyatakan kesediaan bertolak ansur terhadap kecurangan teman wanita termasuk berbincang dengan pasangan sebelum memaafkan mereka."

"Sebaliknya 70 peratus wanita akan meletakkan syarat jelas dan jika pasangan terbukti tergilakwanita lain, mereka akan menamatkan hubungan berkenaan serta-merta," kata kajian terbit.

Tinjauan dalam talian bertajuk 'Tabiat dan Pilihan Pasangan' itu dijalankan aplikasi janji temu bertujuan membantu individu bujang mencari pasangan hidup sesuai.

Keputusan tinjauan berdasarkan 1,000 responden iaitu 500 lelaki dan 500 wanita.

Nilai dan budaya Timur yang masih kuat diamalkan
di negara ini menambahkan lagi kepercayaan mereka untuk terus setia dan kekal dengan pasangan masing-masing"

Siti Fatimah Abdul Ghani,
Ketua Seksyen Psikoterapi dan Intervensi Bahagian Kaunseling UPM